

Oqaluuserisassanut nassuiaat

(Inatsisartut Siulittaasuat)

Isumaliutissiissusiornermut piffissaqarnerunissamik ataatsimiititalianit qinnuteqaatinik arlalinnik siulittaasoqarfik tigusaqarpoq, taamaattumillu oqaluuserisassat arlalitsigut naleqqussarneqarsimallutik.

Immikkoortup 37 Inatsisinut Ataatsimiititaliamut suliarineqaqqittussanngortinneqarpoq ataatsimiititaliarlu naatsorsuutigineqarluni pingajussaaneerinninnginnermi ilassutitut isumaliutissiissuteqassasoq, taamaattumillu immikkoortup 37-ip pingajussaaneerneqarnissaa novembarip ulluisa 13-iannut kinguartinneqarluni.

Immikkoortup 37-ip qulequtaraa:

Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisissaattut siunnersuut

Ineqarnermut, Attaveqaasersuutitut Isorliunerusunullu Naalakkersuisoq

Aningaasaqarnermut Ataatsimiititaliaq immikkoortup 18-ip pingajussaaneerneqarnissaanut isumaliutissiissusiornissaminut paasisutissanik Naalakkersuisunit utaqqisaqarpoq.

Pingajussaaneerinninnginnermi isumaliutissiissuteqarnissani ataatsimiititaliap naatsorsuutigaa, taamaattumillu immikkoortup 18-ip pingajussaaneerneqarnissaa novembarip ulluisa 13-iannut kinguartinneqarluni.

Immikkoortup 18-ip qulequtaraa:

Uunga siunnersuut Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaata allanngortinnera pillugu Inatsisartut inatsisaat Aningaasaqarnermut Akileraartarnermullu Naalakkersuisoq

Inuussutissarsiornermut Aatsitassanullu Ataatsimiititaliaq novembarip ulluisa qulingiluaanni isumaliutissiissumminik tunniussivoq, taamaattumillu immikkoortup 106-ip aappassaaneerneqarnissaa novembarip ulluisa 13-iannut kinguartinneqarluni.

Immikkoortup 106-ip qulequtaraa:

Avanersuarmi inuussutissarsiutinik inerisaanissamut siunertalimmik periusissiorinissamut, ilaatigut qaammarsaassutitik pikkorissaanernillu imaqtartussamik UKA2026-mut suliaqaqqullugit, Naalakkersuisut peqquneqarnissaannik Inatsisartut aalajangiiffisassaattut siunnersuut.

Inatsisartunut ilaasortaq Lars Poulsen, Siumut

Inuussutissarsiornermut Aatsitassanullu Ataatsimiititaliaq immikkoortunik 140-mik 167-imillu suliarinninnerminut piffissamik sivisunerusumik pisariaqartitsivoq, taamaattumillu immikkoortut 140-p 167-illu aappassaaneerpeqarnissaat UKA25-p immikkoortuata aappaanut 2026-imi februaarip ulluisa sisamaannut kinguartinneqarluni.

Immikkoortup 140-p qulequtaraa:

Ingerlatsiviit Namminersorlutik Oqartussanit pigineqartut Grønlands Erhverv-imit ilaasortaajunnaartinneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartunut ilaasortaq Pele Broberg, Naleraq

Immikkoortup 167-ip qulequtaraa:

Nukissiorfiit, Asiaq Misissueqqaarnerit, allallu immikkoortorta qarfiit Namminersorlutik Oqartussat ataanniittut, Grønlands Erhverv-imit ilaasortaajunnaartinneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartunut ilaasortaq Pele Broberg, Naleraq

Inuussutissarsiornermut Aatsitassanullu Ataatsimiititaliaq immikkoortumik 145-mik suliarinninnerminut piffissamik sivisunerusumik pisariaqartitsivoq, taamaattumillu immikkoortup 145-p aappassaaneerpeqarnissaa 2026-imi upernaakkut ataatsimiinnissamut kinguartinneqarluni.

Immikkoortup 145-p qulequtaraa:

Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturiannut kalaallillu inuiaqatigiivinut ilisimasaqarnissaat pillugit Naalakkersuisut Inatsisartunut inatsisissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq.

Naleqqap Inatsisartunut ilaasortaattai

Nunanut Allanut Ilisimatusarnermullu Naalakkersuisoq naalakkersuisoqarfimmi ulapaarneq pissutigalugu immikkoortup 14-ip Nunanut Allanut tunngasutigut naalakkersuinikkut ingerlatsineq pillugu nassuiaatip kingusinnerusukkut tunniunneqarnissaanik kinguartinneqarnissaanillu qinnuteqarpoq. Immikkoortoq 14 novembarip ulluisa aqqarnganni oqaluuserineqartussaagalarpoq maannali 2026-mi upernaakkut ataatsimiinnermut kinguartinneqarluni.

Ukiup naannginnerani eqqartuusseqataasartussanik qinersisoqarnissaanik Nunatta

Eqqartuussisuuneqarfia Inatsisartunut qinnuteqarpoq. Oqaluuserisassani immikkoortup 5-ip

Siunnersuisoqatigiinnut aalajangiisartutullu ataatsimiititalianut ilaasortanik qinersinerup novembarip ulluisa 13-ianni ataatsimiinnertut matoqqasutut immikkoortullu 2-p Oqaluuserisassanut nassuiaatip kingorna nangeqqinneqassasoq siulittaasoqarfiup aalajangerpaa.

Uku akornanni taasisarnerit pillugit isumaqatigiissuteqartoqarpoq:

Pele Broberg, Naleraq aamma Pipaluk Olsen, Demokraatit.